

血鬼遊尸穢滯長泯利我生關閉我死門若有真命聽對帝前
使我長生劫齡常存太帝之法敢告三元畢又叩齒三七通嘯
液十過都畢此名爲太帝制魂伐尸神咒之法也血尸七惡被
此咒者皆得滅於死尸之下魂明魄柔受化於三宮之中辟惡
除病令人神明不死常能誦之則終身不被魔昧凡存念上道
咒除三尸之時常當採取白芷草根及青木香合以東流水煮
取其汁以沐浴於身辟諸血尸惡氣亦常可和香燒之以致神
明若無青木香亦可單用白芷凡庚申甲寅之日是血鬼遊
尸直合之日也天炁交合七魄兢亂淫穢混真邪津流煥明法
動精七魄散每至其日當清齋別處不雜他席慎不可與夫
道藏輯要

雲笈七籤

卷

井集三

婦相見及同牀而寢又不可爭競財色所行非道之方也每當
燒香感氣修行之時消咒之法亦可誦經混神若思洞房帝一
之事唯使精真以爲意也

太帝辟夢神咒第二十二

凡道士忽得不祥之夢或夢與人鬪爭或相收錄者此亦七魄
遊尸所爲也或導將外鬼來入本宅或三魂散翳五神戰勃或
被束縛不得來還故使惡夢非祥將有禍敗之漸也卧覺之時
卽正寢上向接手心先叩齒三七通畢乃微咒曰

九天上帝四門八靈七房二玄三素元精太一桃康上詣三清
速告帝君攝命黃靈速召七魄校實黃庭若有不祥七尸鬼兵

從呼雙真流濁鍊形太微大神斬伐邪精三魂和柔血尸沈零
神歸絕宅觸向利貞使我神仙長保劫齡咒畢又叩齒二七通
嚙液十過此名爲太帝神咒辟夢除凶之法能行之者則三魂
和鍊七魄受制神明氣正尸穢散滅而向所咒之鬼卽已受考
於地獄矣經三咒之後自然靈感吉應不復夢於非常也

三元八節朝隱祝第二十三

凡道士禮願神明精思上法行諸隱咒之時皆當燒香心拜密
咒而已勿使得耳聞之也若欲咒伐六天滅諸凶鬼者乃可小
發聲耳亦不得絕大高響使傍人聞解之也若讀誦之時乃任
意耳凡八節之日皆三天仙靈朝宴禮會之日兆修行禮願朝
道藏輯要

雲笈七籤

卷

并集三

禮之時皆當齋用此日至於朔望朝禮非上法也凡是其日欲
行禮願陳祝當先叩齒七通心拜四方乃微祝曰

上清玉帝三素元君太上高靈仙都大神今日吉日八願開陳
上願飛霄長生神仙中願天地合景風雲下願五藏與我長存
次願七祖釋罪脫愆又願帝君斫伐胞根六願世世知慧開全
七願滅鬼馘斬六天八願降靈徹聽東西上願一合莫不如言
願神願仙上朝三元祝畢又拜如初亦適意所陳求解脫七祖
之愆及首己之罪狀一續於行事之後也此名爲三元八節朝
隱祝上願神仙之要法也行之三年七祖父母及己之罪都解
釋矣然後玉華降衛感會神明八願開陳必獲靈仙之要契